

意苕山館詩稿

序

綬之友陸君希孫也始歲戊寅秋試罷寂居無聊有客楚
然來袖出綬闈藝評泊太息是爲尊甫少游先生初未識
綬至是爲綬文錄副走相慰美意勤摯並命希孫來定交
虞仲翔知己之感不能一日忘也希孫能讀父書英偉有
器識曾遊浙東西詩思挺秀得山川之靈學務閎覽而持
擇精審虛懷粥粥驟窺之若無有亦連試不得志以貢就
校官是時先生棄養令弟春覃且前卒希孫應順天試復
黜賃一驢歸他人處此憫惻憤懣必有甚者而希孫終天
之憾惟念不及以顯揚事親并悼弱弟之早喪通塞否泰
不爲一身計較也頃者示綬一卷詩屬以言夫綬何能言

詩者性情也有性情而后有詩無性情是無詩也性本於天情發於人本於天者輔之於學則益厚發於人者衷之於道則加醇緩之言詩如是而已是皆希孫所自有者也希孫交遊不濫不狎勸善規過有直諒風此亦性情之過人者希孫之詩希孫之性情也讀者以緩言求之可已

道光己丑十有一月同縣朱綬仲環甫譔

序

昔人論詩謂學杜必從玉溪入以玉溪爲杜門戶未有不
由門戶而能入室者斯言也誰不謂然然學玉溪者往往
襲玉溪之貌搆摺割裂一以豐富藻麗爲主而於玉溪之
追蹤杜陵者萬不得一焉是不僅杜之室不能入并玉溪
之門戶亦不能由也蓋變玉溪而爲西崑雖玉溪其可學
乎吳門陸子方山善學玉溪者也得玉溪之神不襲玉溪
之貌所謂包蘊密緻衍繹平暢味無窮而酌不竭者其庶
幾由玉溪以窺老杜而與香剝玉溪之流有不可同年而
語者方山年正富力正強劬學不已異日所造又豈可限
量耶余將自武林還都方山送余於鷺脰湖邊翦燭論詩

有離別之感焉情不自已書數語爲贈卽以序方山之詩
也可

道光十有五年歲次乙未春二月新城陳用光撰

序

今天下學者競言詩詩非可苟而已爲是詩必有其所以爲之者不得其所以爲之而徒流連光景尋常酬贈是務甚且淫哇間出以自背於正軌詩云乎哉夫所以爲之者何也曰性情是也性情有內以敦敘彝倫外以彌綸民物休戚之相關哀樂之相感不期於爲詩而詩以生焉昔李百藥見文中子而論詩上陳應劉下述沈謝分四聲八病剛柔清濁而文中子不答退而問於薛收薛收曰吾嘗聞夫子之論詩矣上明三綱下達五常於是徵存亡辨得失小人歌之以貢其俗君子賦之以見其志聖人采之以觀其變今子營營馳騁於末流是夫子之所痛也不答則有

由矣烏呼觀文中子言詩道之大可知然要其故不外乎性情故又曰詩者民之情性也吾友陸君方山長於詩者也去夏京口之變君適司訓是邦盡失其所箸譔獨詩數卷先爲其友邵君取去幸而存爰急爲之付梓歲之殘臘余送客江上還過君齋兵燹患難之餘握手相勞問君因以見示屬爲一言余攜歸讀之其運思清其擇言雅而其所以爲之者一出於性情之摯其中如游子之悲喪弟之戚能令人動心墮涕至於軫念民瘼感觸時艱則又旁皇惻愴無異杜老之詠諸將次山之賦春陵雖以繼聲風雅可也京口比年遭水加以寇鋒縱橫生靈塗炭今雖流亡漸復民氣未蘇君目擊禍壘所爲紀災紀事又累數十章

誠使當塗諸君子見之怛然有所傷炯然知所戒因推君作詩之性情以施諸政術焉則詩人之爲功於時良不少矣

道光二十三年歲在昭陽單闕二月震澤張履謨於華陽學舍

序

董琴涵師詩有曰我愛方山子硜硜古性情性情古故詩不能不古知言哉今夫印金玉石也其文朱也其篆籀與斯之筆也求籀與斯於朱一誤也求籀與斯於金玉石再誤也秦人之語楚人學之而齊人更學於楚人將不得秦焉而并失其齊事三傳而必譌世之稱學杜詩者類是也然而干燈一火必有其不滅者不滅者在火不在燈有火無不可以續燈也詩之爲道性靈之炯炯其火也杜之爲詩長明之燈也我有火之性取焉無不然也干燈同一火正一燈爲一火也方山之詩新城陳侍郎一序之稱其由學玉溪而得杜正宗亡友朱仲環再序之謂方山自有其

詩不必執杜以求以余觀之方山固自有其詩實學杜而得其質厚一體者玉溪門庭間亦託足究未嘗由之而取途雖然陳與朱所見方山曩日之詩也徘徊紆鬱境猶恆常比年災祲頻告海氛突揚方山至目睹兵燹幸脫性命於鬼手宜乎其詩之日變初若水漫衍於平地繼遇磯洑而歎激注江海而崩騰水非有意於崩騰歎激也勢驅之而不能不鬱以怒奮以厲境爲之也抑有說焉杜陵感時諸作皆明目張膽而言玉溪生則必紆曲晦隱以出之由其時世變益亟不復可以杜陵之言爲言也方山今日誠何取乎紆曲晦隱必借徑焉而後有合哉方山亦自有其詩而已亦自有其得杜質厚之一體而已方山以爲知言

而屬序之簡端我將持以歸質我師
道光癸卯仲春下旬張肇辰同甫譔

元 麟 步 山 光 生 讚 勝

徐 邨



嗚呼先生遇屯道身遺書聖
尺純身性情出依諸侯明發吞
聲退就冷官再困危城嗚咽弟
妹激昂只仰叢為歌行逼真
少陵神聖寫定名孫蔚興前
賢往矣振此公聲

鄉後學許玉璩謹贊



意若山館詩稿目錄

卷一

戊辰

至

己丑

古今體詩一百首

卷二

壬辰

至

甲午

古今體詩七十八首

卷三

丙申

至

戊戌

古今體詩七十首

卷四

己亥

至

辛丑

古今體詩九十五首

卷五

壬寅

至

癸卯

古今體詩七十七首

卷六

甲辰

古今體詩五十三首

卷七

乙巳

古今體詩七十七首

卷八

丙午

至

丁未

古今體詩五十二首

卷九

戊申

至

己酉

古今體詩六十五首

卷十

庚戌

古今體詩五十四首

卷十一 辛亥 壬子 古今體詩八十七首

卷十二 癸丑 古今體詩九十二首

卷十三 甲寅 古今體詩六十二首

卷十四 乙卯 丙辰 古今體詩九十八首

卷十五 丁巳 古今體詩六十四首

卷十六 戊午至庚申 古今體詩一百十七首

意若山館詩稿卷一

元和陸

嵩希孫著

男懋修九芝校

戊辰

至

己丑

老屋

吾家有老屋地近城西隅僻原巖谷喧尙非衝衢門前
抱流水一碧涵清虛石橋引屈曲古寺通回紆樗雖不才
木大已合抱餘炎暑藉庇蔭塵慮銷襟裾有書還此讀敞
亦先人廬

敞廬不數椽僅可蔽風雨東家峻閣闕西鄰厚牆宇朝聞
鼓鐘聲暮已易其主聚族二百年七世此安處雖無高車
馬出入耀門戶庶幾炊與春免賃他人廡世澤不可溷吾

自思吾祖

吳興古名郡吾祖舊結鄰
避亂此遷徙故宅荒荆榛
墓田尙數畝手植松楸新
首邱古所念返葬今猶循
死爲弁山鬼生作長洲民
歌斯哭非斯兩地皆榆枌
安得構茅屋更傍苕溪濱
往來共昆弟嘯詠怡昏晨

陳橋驛

風沙莽莽黃河起六軍喧呼點檢止
方面大耳殺不盡竟被黃袍作天子
黃袍倉卒求何人袖中先出陶穀文
素有志今果爾混一區宇功何神
當日紅光滿營燭宮中早應焚香祝
華陰處士方騎驢一笑五代不足六
興亡氣數已可知符讖豈徒病龍筭
惜哉長樂老已死勸進紛紛但

餘子舉朝不作褚淵生祇有韓通一人耳黃龍鼙鼓動地
來六官北去車如雷趙家一塊厓山肉也有孤兒寡婦哀

蔡中郎故里

中郎生漢末運世悲遭屯念當應明詔天變切指陳亦欲
效骨鯁豈意披逆鱗不幸用姦卓未免傷私恩太息付廷
尉道路咸酸辛所以親不失聖門重所因託身苟或昧文
采將安論我行經故里憑弔空斜曛

臨淮

平沙淺草路漫漫爭趁歸鞭破曉寒衫袖薄侵霜氣溼馬
蹶驕踏葉聲乾苔空廢巷迷秋蝶雲護高臺冷釣竿聞道
舊時雞犬盡仙蹤何處問劉安

舟暮

小鎮揚帆過蓬窗暮色侵亂鴉梳屋角殘日浴波心漁網
收前浦炊煙出遠林故鄉知路近歸夢已先尋

紀事

銀河波浪淨纖埃忽見機槍逼斗台萬劫蟲沙三輔聚一
時風鶴八公哀河山有誓恩偏忘闕寺無權禍尙開驛埃
烽煙驚四起飛書草檄費羣才

崔巍漫說虎牢城貫索芒騰午夜明地下早傳袁粲死賊
中誰信鄭虔生時清戰伐朝廷重變起倉皇郡國驚磨得
鞞刀看如雪全家碧血瑩三更

玉輅巡還肅早朝高瞻紫氣滿雲霄翺翔河上猶高克漏

洩師期豈豎刁北闕神威雷電震東京士氣管弦驕承
恩莫道材官少亟爲驅馳答 賜貂

太行迤邐接東蒙殺氣連營一夕空楊僕樓船原健將劉
琨鐵騎先元戎雪銷鎧甲千山白日閃旌旗萬谷紅早晚
捷書騰 黼座盜兵還與閔 宸衷

澗上草堂

蕭然廿載閉柴荆過眼滄桑自變更千古高風追泄柳一
生心事託侯嬴采薇得食何憂餓卻聘無書爲晦名誰似
山陰戴處士死生不忘故人情

茅屋

幾家茅屋隔東西綠樹陰濃路欲迷一徑白雲封不斷亂

山深處竹雞嘯

呈沈木菴丈

丈人我通家於禮稱父執猥蒙折輩行一室恣問答曾懷
千載史數若私家牒酒酣論縱橫得失了口頰興來作詩
歌筆欲雨風挾賤子走且僵襟袖敢橫獵相喻豈近歡厚
期在絕業從游責令子聞命汗肌浹逡巡几席間直似古
賢接真意之所感鬼神且可泣知識雖蠢愚寤寐矢銘戢
遠懷仲翔言慨然謝結納

平望酬葉漑吟

樹枚

不覺衣冠古相逢笑語溫孤燈明旅館落葉冷柴門舊事
憑重話新詩與細論隨園門下客今有幾人存

驅疫

炎暑盛今夏奇疾忽同遘秋深尙未已傳染雜老幼始但
捧其腹繼或搖厥脰能俯不能仰體曲若痾僂色或黑或
青肌肉印深透乍聞聲呶唔倏見面黃瘦飲啜朝自如哭
泣已當畫醫師窮於術問之各眉皺但云是時疫應有厲
鬼守愚者信其言延巫肆詛祝道殣仍相望誕妄互欺售
我思疫所興必在兵荒後歲豐而時和沴氣曷憑湊況彼
癘疫鬼本是高陽胃瘡鬼亦其族濟惡歎已舊退之驅以
詩遠勝醫巫詎果爾鬼尙靈厥功我能奏不然陰陽乖致
損人民壽非有調燮權斯禍欲誰救一笑吾竟免或者鬼
其宥

出門

歲暮事行役，雨雪方霏霏。雖云出門好，未必家居非。飢寒奈相迫，欲行心還疑。長跪別父母，有淚先沾衣。菽水不能養，晨昏況遠離。兒罪復何言，兒去當早歸。下堂看我婦，默自顏含悽。始知家居好，出門終可悲。今日下船去，明日故里違。回頭望門前，樹影猶依微。反覆不成寐，歸來知何時。

舟行卽景

蒲帆尺幅雨中收，柔櫓搖風客夢愁。一路桑麻看不斷，秀州行過便杭州。

山陰道中

撥櫂過西郭，落日川原紅。清陰互十里，延引岡巒崇。竹石

互回映蒼翠涵空濛樹密路疑斷岸轉谿仍通疏籬覆曲
澗高閣凌長虹漁舟出煙際欸乃迷西東繫纜欲何處客
夢愁朦朧

剡谿歸櫂

客本無能欲誰說長缺何爲彈不絕且喜無車卻有舟便
教一櫂剡谿撥剡谿谿水清泠泠一夜北風吹作雪推蓬
起看路盡迷何處青山露雲缺老梅笑人俯岸旁寒碧依
然浸花骨

寄陸子愉

麟書

江右

去年別君歸蘇臺菊花空向西風開今年送君還南昌恩
恩又負槐花黃十年幾度此潦倒那得盈頭髮長好若言

知遇會有時轉恨青衫著身早獨憐八口羈天涯欲歸不
得空君嗟詩能窮人語果信慎勿險韻誇尖义君不見長
安道上看花客駿馬珊瑚鞭自得得笑指蓬瀛路不迷別有
仙風引咫尺

苦雨

一雨又十日入夜勢愈猛念從五月來幾日漏旭景街市
游魚蝦庭院聒鼃比鄰斷往還咫尺隔畦町行行出郭
門四望潦沒脛坐泛任小舟短槳掉樹頂茅屋浸波濤石
橋戴笠簪茲况秋已交潺潺聽彌警東家牆半敝西舍突
欲冷嗚號滿深巷轉徙漸同井非獨死亡踵兼恐盜賊併
民命欲誰哀彼蒼共引領

查災謠

西鄉民從東鄉回道逢官府來查災官府傳呼里正來吾
奉上司命卹災上司當惜國賦財有男未賣有女未鬻如
此戶口不得開西鄉民聞哭且哀不見東鄉好官府開報
口數據災戶

注荒謠

官注荒冊田吏勸民出錢荒田一畝錢一千有錢注荒租
准蠲無錢注荒租催完租吏到門呼聲喧官租不完捉見
官官曰爾田荒是實胡弗注荒減租額

散振謠

朝廷萬萬錢飢民萬萬口小口一月米幾升大口一月米

幾斗飢民依舊滿街走官能一一查戶否官不能查振何
有官錢那入飢民手此意問官官不知官不知民仍飢民
雖飢吏則肥

書徐秋士

元潤

薊門游草後

十載才名滿上都馬蹏輪鐵老征途燕臺神駿爭收骨東
海癡龍獨抱珠風捲黃沙邊壘迴霜飛白草塞垣枯埽除
豪氣餘詩卷岳色河聲入夢無

野步

芳草連天長舊痕春風何處最銷魂斷橋西去垂楊外滿
地濃陰盡閉門

樹頭不住子規嗁杖策閒聽過碧谿流水自來人自去夕

陽黃徧菜花畦

重九登高分韻得日字

重陽例風雨晴明快此日步出西郭門心目騁怡悅原上
草已枯樹頭葉微脫鳥喧境逾幽谿繞路彌折遠山露溼
濛煙靄補林缺鐘聲出古寺夕景欲西沒稻刈雲方空平
疇見遼闊稔歲不易逢循隴共切切民困知未蘇流離欲
誰卹水利亟講求旱潦備蓄洩庶幾屢豐年樂游恣佳節
徘徊久忘歸菜萸自采掇

游支硎山

探奇歷層巒步步心棲戀路轉衍百折徑仄引一綫白雲
回晴空散霞弄餘絢煙蘿欲手捫溼翠忽衣濺潏潏阻飛

瀑磴滑絕盤旋凡骨換未能仙境但餘羨屐齒知誰留相
尋悔已晏

憩吾與菴

萬緣不能屏動輒作奇想偶然山林游清曠絕塵埃便思
築室居此念亦殊罔山僧笑相迎茶菽供瓶盎經堂坐聞
閒平疇望廣廣念彼衣食資不缺豈其儻藉非猿鶴羣巖
壑任來往胡能忍飢餓人事謝俯仰吾分苟自安真樂焉
用強浩然欲出門清磬一聲響

哭春潭弟

蘇

死喪最可哀道路遇匍匐而況同氣親得禁失聲哭嗟我
寡兄弟惟汝一身獨如何未三十遽賦買生鵬傷哉左右

手旣斷不可續形影顧子單出入動悲觸歡笑強親前餘
痛轉反覆初我試鹿城辭汝手堅握謂余病已深年命恐
迫促頗怪言不祥欲行復躑躅勉強相勸慰掩面淚欲沃
可憐未逾月汝病變何速我歸三月五汝死正初六儻再
一日遲重泉隔絲邈已矣更何言他生那可卜慘思坐汝
牀嗚咽若有屬我時心刀割張目但悲矚痛定想汝意汝
豈別有欲無子或自傷閔念望手足我兒卽汝兒何嘗異
骨肉揮淚呼兒前長跪易衰服恨不早汝慰使汝死瞑目
更痛垂死時哀號動帷幄放聲喚耶孃深恩負鞠育兄嫂
善事親毋傷弟不祿不孝不弟人死知罪莫贖嗚呼聞汝
言我腸斷不覺汝愛我兩兒勤劬爲課讀暑寒不稍輟惰

卽加鞭扑復憐兒體羸深悔過責督心力耗頻年臨危尙
諄勸兒亦知感恩繞牀呼阿叔一室聲悲哀陰風慘明燭
我長汝八年嬉戲幼未逐迨汝旣長成離別又頻數怡怡
一堂中知積幾寒煥汝幼嗜讀書操行復醇篤慘絕數日
前殘稿尙手錄絕筆檢枕函淚眼拭昏瞶言念汝平生事
事傷衷曲親老敢過哀賜回終如轂九原儻可尋魂夢庶
一蹴

餘哀未盡復成絕句

今日方成哭汝詩深宵涕淚滿懷滋追思萬事皆余感豈
獨傷心永訣時

誤我浮名一月無病中相送更相呼可憐滴盡思兄淚望

得兄歸淚已枯

歷歷平生祇自傷
黯黯無語獨昏黃
不堪垂死聲聲喚
兄嫂耶孀欲斷腸

無人不唱上留田
長被情深獨汝賢
悽絕向人傳一語
出門誰得阿兄憐

敢向親前涕淚橫
難排無奈弟兄情
此生執手惟今日
那禁憑棺哭失聲

自傷同氣只三人
有妹遙離已十春
今日雁行驚忽斷
西風兩地淚沾巾

思量往事總秋歔
歔滿目淒涼顧影餘
最是堂前兩白髮
爲傷爾死倍憐余

託鉢依人事可知艱難門戶仗同持從今獨繞衰親膝無復呼兄喚弟時

題願亭林先生遺像

歎息遺民去不還青衫黯淡想丰顏著書慷慨文中子卻聘淒涼謝疊山壯歲聲名凌復社暮年詞賦動江關吾宗高隱桴亭老合許先生伯仲間

簡唐春舲

紀雲

空齋常閔寂獨坐少人過吟興近來減離愁何處多落花門外雨芳草渡頭波尊酒誰相對遲君意若何

乞程序伯

延鷺畫

老桂纔黃細菊斑乞君點筆寫秋山寥空莫著南飛雁怕

有銜蘆隻影還

游棲霞山寺

塵襟不可滌振興思尋山披衣亟登岸明月猶未殘煙蘿
悉攀踐隱隱通禪關寺僧出迎客導引循彎環梵聲越煙
際鐘響浮雲端階前竄蒼鼠樹杪呼清猿流泉過曲徑不
斷聽潺湲晨游少徒侶獨往歡知慳催歸漸嚮午故步尋
闌珊歎息迫人事役役驚風湍

登雞籠山望後湖

迤邐幕府山遂陟雞鳴麓下瞰元武湖波流帶屈曲飛鳧
拍水浮荇藻牽風綠秋氣颯以清商颿振古木緬想有明
初武功盛南服於此習水操旌旗耀滿目自從王氣衰亭

臺盡傾覆山頭功臣祠荒涼踏樵牧惟餘往來人經過拾
殘鏃興廢豈有常歸途歎躑躅

阻風登燕子磯

危磯抱江流日夜勢奔放險要扼東南石城倚保障時平
無戰爭相激但風浪巍巍孤亭岡巒兀相向振衣一登
眺四顧覺神王亭下聚千帆往來若爭抗我生幾經過到
眼失青嶂轉幸此阻風雨日快停舫然炬愧阮亭夜游恣
清曠乘興留一詩絕代讓高唱

江行遇順風過京口作

夜半潮生載客還一帆風急送潺潺朝來夢醒知何處尖
卻金焦兩點山

鹽豉虛傳末下名西風颯颯動鄉情明朝定過毘陵驛好
覓鱸魚入饌烹

沈敘軒

停葬

觀察屬校近詩卽題其後並送北行

李杜以後稱能詩昌黎兀冪空當時姓名卽不挂金勝千
載豈得無人知公詩辦香別郊島官職聲名况兼好獨抱
此恨知何爲放眼乾坤得無小虛懷授我校夜深開卷光
氣騰球琳有時自作鳳鸞嘯入耳豈比蛩蟻吟感激空堂
手頻執正憐被放西風急別我明朝返上京離情還逐江
頭楫

自夾山濠陟唐子山展先墓望道場山塔頂作

兩崖高束勢千丈濠闊波深互激盪舍舟登岸路曲盤磴

滑梯危聳身上憑高遠望峰四圍斯峰平立眞如掌一峰
對面欲插雲俯瞰諸峰盡平壤雲間現出古浮圖飛鳥絕
迹不敢往凌空倒影向墓前鬱鬱松楸共俯仰我來展墓
塔未登建塔高僧此空想一筆離方卓果奇科名異代符
非罔

事見嶺
洲可談

祖德吾慙述未能碑碣摩挲倍心惘

黃同塢謁先君子墓

腸斷親何處知兒到此無重泉堪竟隔長夜欲誰呼築室
心知負題碑願亦孤松楸三載望昏眼痛模糊

北塢省春潭弟墓

不共廬親墓翻來上汝墳令原悲未竟烏哺痛難分嗚咽
隨流水淒涼對夕曛年年腸斷處惟有紙錢焚

歸自吳興送唐春舫之關中兼示徐秋士大令

歸遲猶未隔河梁，翦燭宵深坐欲忘。
未免離情當歲暮，縱投知己亦他鄉。
艱難門戶平生負，冰雪關山道路長。
爲語徐陵儻相憶，故人涕淚滿衣裳。

回疆

冰山蔥嶺豈回疆，重鎮頻煩簡廟堂。
甲第恩深森棨戟，丁零路遠按牛羊。
陣雲寒壓弓刀肅，烽火光騰驛堠長。
愁絕征袍縫雪夜，出關休道卽沙場。

寒檠永慕圖爲顧子雨

喻元題

春暉望斷恨何窮，漂泊憐君類轉蓬。
攬鏡漸移雙鬢綠，隔衾猶擁一燈紅。
白雲老屋寒殘夢，枯樹深山泣晚風。
我亦

傳經痛難讀不堪有母累尸喪

顧子雨復賦悼亡詩以爲唁

一曲離鸞未忍聞膠弦重斷劇憐君青衫淚點知多少舊恨新愁漬不分

遺挂昏黃對獨愁瀟瀟風雨不勝秋從今識得牛衣樂夫婦人間幾白頭

丹徒舟阻

順風正揚帆水淺阻京口舳舻互丹徒十里尾銜首欲行不得前繫纜岸峻陡蓄水版乍封往來盡擔負牖夫手官符邪許卯及酉此河漕所經濟運賴已久設牖引江湖豈正利田畝歲挑例有常工作諒無苟曷爲道旁泥堆積漸

成阜奔瀉雜瓦礫淫雨四時有江形日以低地勢日以厚
倒灌潮所難壅塞欲誰咎空糜水衡錢孰卹商編守夜深
聞喧譁三歎舫徒扣

題包慎伯

世臣

孝廉中衢一勺後卽贈

儒者尙著書虛聲鄙淺學達可見施行窮乃抱空谷方今
漕與河先務急當局河爲漕所經憂勞倍黃屋持節皆
中書參謀亦令僕需才正孔殷旁求競推轂涇水有軼賢
講求思爛熟史遷書河渠其辭孰能讀輟轉泥古曾徒訝
論驚俗河自周定時南徙始反覆由漢逮元明橫決患頻
數成平東光閭故迹邈九曲海遠山更遙兩岸少束縛急
溜奪泥沙安得廢防築世無平當徒禹功問誰續三歎撫

斯編徘徊企高躅

送周雨蕉

庶盛

之官秦中

日邊休道卽長安
寥落功名付一官
吳苑春風停客櫂
潼關落日據征鞍
弦歌久廢流亡滿
烽火初經撫字難
爲報秦中諸父老
使君身亦是孤寒

西域凱旋詩

玉門烽火照連天
宵旰憂勞已一年
誰道如今少頗牧
捷書聞早達甘泉

渾巴河畔陣雲低
殺氣深宵動鼓鞞
健將橫刀竟飛渡
征袍亂濺血如泥

功成張宴正黃昏
此夕難游釜底魂
何異上元燈火夜
將

軍飛報奪崑崙

振旅元戎受 詔還傳烽絡繹罷秦關定知絕域威聲震

百石弓縣鐵蓋山

還軍萬里肅秋毫一路歡聲擁節旄三月春風少楊柳雪

花猶是滿弓刀

神功千載震窮荒百尺穹碑勒道旁誰是淋漓大手筆捉
刀未許段文昌

陳雲伯

文述

大令以所著頤道堂集見贈賦謝

生世寡所諧寂寞守家弄柔翰手自操敢望知者重偶過
頤道堂談言許微中款曲遂連宵襟抱感推送貽以徑寸
集商推一燈共攻擊毋他時戲語矇交關見聞陋拘墟有

若醯雞甕振翮思雲霄願言引鸞鳳

燕游紀別

無端策馬欲游燕漫道豪情尙昔年老我名場垂四十笑
人客路又三千鞭絲帽影縈前夢斜月疏星悵別筵市上
狗屠今亦少悲歌慷慨更誰憐

艱難休便說征途消遣離情酒借酤婦病可堪兒女累親
衰況是弟兄孤傷心涕淚三年溼撲面風塵六月麤感得
親知連夕話劍光燭影兩模糊

已分終身託縈匏雞鳴風雨自衡茅略因親老名微戀不
爲途長夢易泆中澤雁鴻愁共集故山猿鶴怕相嘲祇餘
一事差堪許添得新詩數首鈔

入世逢迎拙，久安向人懷。抱欲誰寬飛，鴻自信衡陽。暖飲馬先愁，易水寒落日。暗隨塵滾滾，浮雲不隔路。漫漫歸期，預說知非遠。風雪梅花一樹看。

渡河

莽莽黃沙拂面過，廿年重此渡黃河。蒼茫北望迷陳迹，浩蕩東奔感逝波。客路從今清夢少，中流自昔濁泥多。浮生歷盡風濤險，擊楫愁聞慷慨歌。

泰安道中覆車作

首途戒泰安，前行路彌惡。迤邐接熬陽，寬廣更非昨。峭壁東兩旁，谿谷似初鑿。碎石礙仄輪，扶輶碾磅礴。馬足聚難騁，怒發脫羈絡。傾覆忽不防，飛沙莽林薄。幸免墮懸崖，勢

定始驚懼蹈險吾屢悔後路慎所託

留宿張子畏

寅農部邸舍

在貴每忘舊處約易失身誰能兩無愧矯志空前塵君昔未通顯此論持諄諄茲來數相見慰勞情彌親昔別親各健今獨成鮮民尸饗累豈免請粟悲指困知君察我意欲語先含辛雖居聖明世亦恥長賤貧時命要難強窮達將安論深宵感切切交道吾知真

僧寮訪菊

孤芳發晚秋獨秀誰能賞況復依僧寮寂寞避塵埃
初佩非無人楚客已長往幽香散淒風眾卉傲羅幌
春蘭不同時結契空遐想標格終自矜霜月映清冕
素心託無言初

地自尋訪

顧南雅

純

學士寫梅贈行呈此奉謝

雨雪空山自古今橫斜老幹識誰尋
憑將尺絹臨風寫中有千秋鐵石心

鄧尉春歸憶往時故鄉風景不堪思
欲知冒雪尋何日先爲行人折一枝

留別都門友人

西風黃菊未全斑莽莽塵沙落日環
天上故人愁作別客中題句悔頻刪
世逢明盛身慙賤境閱艱難夢得閒
羨爾一行雲裏雁銜蘆先我到鄉關

自阜城至劉智廟道中作

我來自保陽道出阜城縣徑趨南北劉百里行日半駕車
非駑馬遲緩得相怨欲左陷澤中右則難越畔大道豈有
歧直路忽迂遠詢知六月來淫雨積疇岸瀉水少河渠隴
隧盡衝斷嗚呼幽冀間自昔盛漑灌縱橫有洫溝蓄蓄備
潦暎云何便戎車阡陌悉破亂乾溢災偶乘輟耕遽長歎
徒使西北民仰食東南慣善哉靳文襄論此具卓見富國
非無謀利民貴乘便水利苟重興沃瘠壤何變會見秋成
時香秔滿畿甸安用萬斛糶粟挽江淮徧沛然況時霖退
當疾於箭歸壑知何繇必待低區先免令車中人哀哀聽
磬雁

省寶巖叔父

詒變

於德州一宿而別

意外驚相見挑燈話不休
可堪十年別祇此一宵留
骨肉凋零感功名老大愁
何時得歸去重作竹林游

歷下亭

晨興戒游侶尋步城東隅
空亭坐寂靜涼意生衣裾
往昔浣花叟於此寫清娛
湖波尙淼淼交映紅芙蕖
芳宴想初罷佩玉鳴紆徐
落日自生感重過誰與俱
古今有同盡千載名亦虛
相對此浩歌來者知何如

趵突泉

搏水類可過就下性或忘
此本矯揉力夫豈水之常
沈水此潛伏涓流未湯湯
地底突涌出疑有蛟龍藏
餘怒肆噴薄十丈浚青蒼
奔濤劈左右倒瀑飛中央
雨風若相助激

響驚雷硯天工縱巧奪無藉豈得將此泉七十二引之清
且長苟資作吠澮皆可灌稻梁惜徒用機智汲甕誇流漿
濯纓想孺子吾欲歌滄浪

項王墓

漢家久無尺寸土憤王之墓獨千古非戰之罪乃天亡一
夕楚歌閒楚舞惜哉當日鴻門會怒氣空令玉斗碎不然
渡江兵再發楚漢興亡尙難必一死徒然裂五體俎上杯
羹問誰乞寶刀駿馬歸何人魯公禮葬悲英魂英雄末路
且如此紛紛成敗彼徒論

雨雪途泥改道從泃溝渡河投唐石宿

我從濟南歸時未屆寒沍雨雪忽連日積潦滿溝路黏埴

膠車輪疲馬屢蹶仆改道趨泐溝止宿已薄暮思古地官
職民事始和布溝渠既開浚道涂亦平除瑣屑關有司王
政豈無故願告司牧人留心貴平素勿謂此細事疾痛忽
民訴庶幾洽可隆四境樂冒怙非獨恩惠流行旅不知苦
明發途尙泥輾轉夜忘寤

毛生甫

嶽生

歸膠城余之南翔同舟口號

十載風塵感浪游飄然大地兩萍浮一江風雪曹騰夜君
是歸舟我客舟

古憶園弔李長蘅

歇絕風流二百年耦耕何處問前賢殘梅滿樹倚流水嘯
鳥一聲浮曉煙自昔賓朋傾洛社祇今風月感樊川畫圖

省識松圓老

曾爲程序伯題
松圓耦耕圖

愁殺昆明劫火前

入淨慈寺尋南屏諸勝雨止萬峰山房

巒壑啟幽深紺宇敞結構飛費切雲霄傑閣俯星宿金碧
佛莊嚴瞻仰儼靈鷲松栝環蕭森陰窅昧昏晝樵路隨磨
靡蘿徑鼠鼯馳一峰陡插雲縣影入秋瘦杖策俯仰穿偏
仄效痾僕仇足石細碎觸額樹蟠糾滑磴踐紆餘坦途急
相就古洞更獨尋中有乖龍守白霧倏迷漫旭景暗巖岫
雷電掣從橫雨風併馳驟匍匐出叢林招提喜遙覲疾走
迎山僧不暇顧頭仆燎衣且然薪飽飯更擊鉞風澗激旬
旬龍虎互吟吼坐久心始定徐起視簷溜煙霧散遙岑日
光已微逗山色更青蒼石骨露瘦皺蹄屐循松陰溼翠尙

滿袖

由靈隱入三天竺尋乳竇白雲獅子諸勝

雲霧散朝旭蒼翠環重嵐幽尋興未已策杖辭精藍長坡
接迤邐邃谷延訝鈴百泉迸一響急湍飛寒潭溼翠滴修
竹翳懸煙光涵鐘聲出林樾隱隱通瞿曇風日美清晝勝
景徐幽探

略約渡參差樵徑踏平行垂虹飲澗流長蛇臥雲笈纔路
封白雲仄磴滑蒼蘚靈鷲飛何時一峰此關鍵菡萏萬朵
擎噴珠倒縣綫欲窮境幽深敢憚足疲趼回望絕塵埃仙
蹤問誰踐

萬壑斂谿雨眾綠浮煙鬟嘯鳥引前路雲徑通回環上方

不可接鐘磬時一還山果落細細泉水鳴潺潺孤亭暫憩
息沖舉看飛鵬林僧遠相迓茶菽供禪關臨風一長嘯坊
俗曾全刪

僧寮坐既久梵誦來清風白光放佛頂照耀諸琳宮樓臺
燦金碧晃濛迷晴空巖竇入杳冥泉乳流琤琮白雲影縹
緲丹桂香溟濛峰頂一獅吼響應羣山同循崖下曲折峯
粵松林通歸路蹴沙輒樹杪斜陽紅

昭慶寺

宿雨朝初歇招提一徑尋亂泉爭赴響溼磬欲沈音竹外
少飛蠅煙中有語禽僧寮坐寂寂閒與證禪心

庭前草木雜詠

蘭本空谷香寂寞知誰求一朝紉爲佩厥美信靈修
萎棄非所歎蕭艾紛雜糅芳菲願自保昭質終無尤
但勿當門種遭忌誠何憂

牡丹號花王本是洛陽產移植知何年託根傍孤館
雖無百寶闌紙幡翦短短護此一叢花芳信問朝旦
鸚鵡鳴一聲春光倏已晏富貴爾休誇雖開得毋晚

高樓俯水濱下有垂楊柳腰支逾一圍種此十年久
依依短長條春思結千縷雖殊灞橋旁折盡行人手
不得植靈和風流亦何有

東西兩紫荊陰連更條接本是同根株豈復異花葉
無端雪霜摧枯榮判轉睫俯仰此低枝雨風若含泣
恨不當花

時徘徊此久立

殘梅未辭樹桃杏競窈窕開謝替眾芳春光那長好矧茲
風中蓬無根自飛繞漂泊焉可知榮華孰能保風雨日夜
催妍姿變衰老人生無百年坐此傷懷抱

奉懷顧通政南雅先生并乞撰先子誌銘

鸞鷲降庭阿百鳥洗喧聒騏驎來天西羣馬振顛蹶先生
文章宗燕許古倫匹龍門一以登聲價倍平日先子昔少
年慷慨負奇節文網偶共罹諤諤不少屈浩氣完乾坤高
懷比日月兩情逾漆膠千里儼一室嵩時甫勝衣粗知事
佔畢先生每書來惓惓戒勿失賤子雖無知感激切心骨
側聞金馬門談經角屢折治安策賈生開濟慕諸葛不避

越職嫌時思補遺闕致君堯舜心昔賢想彷彿昨秋試京
兆始得杖履謁愀然傷逝情不覺語言溢旣憐趾屢良復
欺足仍別啟事山公頻逢人項斯說將母奈恩恩辭公返
蓬華感激知何言離懷那可述先人負經濟賚志痛早沒
潛德誰能闡所期大手筆北望心依依夢魂暗飛越

七月七日期序伯王心谷集聽雨樓觀書讀畫序伯
寫圖紀事并成九言詩一章亦效其體

炎歊逼人烈烈真堪愁宵來一雨頓覺成新秋紅蕖詞客
一夜支枕喜不寐曉起蠟屐過我聽雨樓寒暄略道不暇
效俗客且令折簡招取王子猷須臾王郎手持尺幅至挂
壁習習引動清風幽盈几堆案墨妙互傳賞奚囊更出花

乳誇冥搜老蘅詩畫印石號三絕心谷篆隸亦復空時流
膏脣拭舌一語不敢發但覺對之神王開雙眸竭來柴煙
糞火鎮混迹曾懷齷齪終日生煩憂詎能撮襟奮袖映座
客那怪伸紙索句空呶嘍飽啖腹朽漸亦不可耐草具惡
食進客渾忘羞人生知己一室豈易得念此真若海上成
連舟狂奴故態那禁復大發縱論今古動輒千秋謀忽然
酒壚鄰笛感無已兩客一主各自神悽愀謂亡友謝松張堪妻
子不知更誰託相如遺稿他日何人求百年過隙如此亦
易易當前不樂安用浮名浮塵塊歷碌太息謝何日空階
蛩韻助我聲啾啾當窗涼風忽又催雨至竹爐茶沸重起
澆吟猴倏悲倏喜並集亦誰識天上笑殺驥女與癡牛安

得一年三百六十日長此芒屨竹杖相夷猶

九日有懷

小樓鎮日坐不見故人來尊酒懶獨把菊花寒自開別離
太無賴風雨苦相催十載西園夢蒼涼感舊苔

清茗山館詩稿卷一終

孫潤庠曾孫家振校字

意苕山館詩稿卷二

元和陸 嵩希孫著 男懋修九芝校

壬辰 至 甲午

齋中讀書偶成

漢高起亭長挾書令未除宰相任刀筆毋怪輕師儒迺聞
公孫說禮樂興須臾文景幾刑措治道非驩虞山林濟時
彥優禮徵安車永明更崇學盛典追皇初吾讀儒林傳興
懷漢兩都

蘇季說秦歸形容歎枯槁金多位既尊匍匐及妻嫂勢利
起家庭交游復何道豫讓爲刑人王成雜傭保不負國士
知竟完覆巢烏豈獨劇孟徒千載高風逸聖賢不得見游

俠安可少

耳餘居約時以死相然信利權爭一朝交情倍轉眴那怪
里巷兒錢刀競鼓釁分金念夷吾指困閔公瑾此誼古人
少豈易望晚近史遷傳貨殖千古有同歎所以陶泉明冥
報矢一飯

堪暉雖同里相識本非昨把臂呼朱生他日妻子託感激
固難言寸心敢忘諾此義今不知安怪俗日薄嗟哉朱公
叔絕交書徒作

淮陰昔未遇亦受胯下辱豕旁容萬家其志空碌碌漂母
苟不逢一飯江頭哭佩印爲眞王千金報不足英雄固難
知貧賤欲誰屬吾思杵臼閒不少公沙穆

孔融薦禰衡其才固云寡曹瞞乃忌之欲殺手聊假一賦
鸚鵡成喪身在江夏北海不能救有淚徒滿野薦固知之
深殺豈出其下今無忌才人安有憐才者何必湘江濱更
弔屈與賈

干祿學所賤希榮士所恥毛義固賢者奉檄乃色喜徒然
爲親屈此意豈得已胡彼延年徒顯要日求躋慘酷貽母
憂託志實堪鄙悲哉仲氏言安得長負米急仕不擇祿願
以告人子

卜商傳喪服曾子問三年凶禮古所重儒生究宜先素冠
見庶幾末俗譏苟便五五杖已除七七齊徒延越禮豈不
痛風教誰急宣慕悼宜終服賓昇誠知言彼哉李義府乃

去國卹篇

東郭歎

步出東郭門阡陌正過雨荷杖逢老農切切爲我語此鄉
皆低田四望近湖渚偶然淫潦逢尺寸少乾土有秋豈易
期荒歉十常五拮据積終年不足納官府民哀已如鴻吏
猛尙如虎太息東家鄰田多號上戶肌膚無有完未解追
呼苦西家幸無田免受胥役侮我聞恤然憂食已少三鬴
況餘未賣田那得望安處

陳石士

用光

沈鼎甫

維嶠

兩侍郎皆有書相招余之

武林王亮生

鑑

赴皖江成此爲別

與君商略沈陳閒天末閒雲任往還
有約漫尋江北路此

仍長賤依人愧浪游寢門無一哭望斷古西州

塘栖重九

昨從石門過中秋今又塘栖作重九往往佳節逢舟中卻
少雨風喜有酒我雖不飲對亦佳況可鄰船召我友主人
愛客載廚傳馳送佳肴雜蒲萸滿盛雙螯大且肥知我天
生有左手江鄉風味許飽嘗酣夢今宵定無負去年卧病
正閉門欲插茱萸不盈首人生滿意良大難一笑推篷看
星斗

姚江道中

山水慕越東浪游昔未徧今日渡姚江篷窗悉流舸雨過
月初升坐久夜忘晏溼翠落衣襟路轉入幽磽前峰已遠

迎後嶺尙餘戀水氣吹菰蒲涼飆送華薦頓令俗慮捐那
更浮榮羨況有同心人深談領繆繼失路感曩時獨行過
冰霰延攬補茲辰山靈笑顏變

鄞縣謁王伯厚祠

制科盛宋代辟召羅羣英四明實淵藪碩彥時奮興厚齋
乃晚出器量超凡恆方其攬轡始四海懷澄清抱負未及
展國步悲夷陵退閒託著述感慨時從橫得失證今古經
濟徵平生豈惟炫鴻博逐物求詳精後儒昧窺測糟粕還
同爭麟皮擅郊鼓會冊寫孝經瑣屑侈發索刻舟智同矜
誰親見倉頡造字鬼夜驚師說況各異傳譌那可徵慎毋
咎作俑流弊茲相乘遺書在宇宙細讀心奚瞞淵源溯伊

洛道脈欽仔承辦香奉夙昔故里帆初停祠下一展拜仰
止空先型

四明弔古

崔巍城郭瞰東閩莽莽風雲護海濱故壘百年空戰伐孤
舟一代自君臣從橫島嶼聯檣暗蹴踏魚龍壓浪馴歎息
時平今已久不忘守險更何人

錢塘至三衢舟行雜詠

一帆風穩送錢江夜半潮聲聽已降客夢欲醒天欲曉疏
疏星斗落篷窗

疏星斜月帶寒流蕭颯菰蒲不似秋貪看龍游好山水夜
深還欲坐船頭

釣臺遙望草堂連
山色江光兩可憐
自笑青衫已如此
強將小妹喚同年

迢遙城郭雨中迷
是處笙歌入耳低
兩岸畫船知不斷
櫓聲搖夢過蘭溪

臨流何處好凭闌
門外斜敲竹數竿
太息浮名今已誤
我來不敢弔方干

落日寒江理櫂遲
客心飛起鷺鷥知
誰將西出陽關句
唱入吳孃曲罷時

七里瀧望嚴陵釣臺

昨夜篷窗落星斗
一帆已挂桐江口
朝來便進七里瀧
迎面兩崖插天陡
壁峭欲絕猿猱攀
石怪疑有虬獅守
中縣

一綫通鳥飛倒吸白浪作龍吼江光山色相盪摩誰此高
歌共盃酒使星明處客星孤落落羊裘亦何有高臺千古
留荒江釣竿今更落誰手可惜風利不得泊瞬息江山一
回首蒼茫鄉思來無端落月孤舫懶頻扣

水牽行

溪清見底石鑿齒奔流直下疾於駛布帆高挂不得前似
竿上鮎磨旋蟻牽夫赤脚曳纜行橫拖逆挽與水爭一灘
未平一灘接兩岸懸崖沉壁立船頭膠泥尾齧沙破浪那
得徑鼓楫天寒冰雪方紛紛肌膚凍裂手足皸呼聲夜半
聽驚起鳴鑼擊鼓催還頻可憐黃頭亦赤子勞役知非自
今始世途險仄誰能平人生處逆類如此

寄若蕙

連番雨雪阻歸舟，歲歲天涯耐薄游。
歷日漸窮增客感，凶年頻過累卿愁。
略無佳緒描青鬢，強藉歡顏慰白頭。
但得牛衣常對泣，底須萬里說封侯。

衢州

衢州古巖疆，戎馬此經歷。
緬維開國初，烽煙久不息。
崇關接仙霞，戰骨路墳塞。
承平今百年，弦歌徧南北。
民俗安耕桑，行李盛館驛。
高塘濱大江，潮聲盪朝夕。
朔風緊連宵，皚皚雪霏白。
寒氣淒衣裳，征途慄魂魄。
念彼守邊士，況乃冒鋒鏑。
遭逢幸明時，吾敢怨久客。

謝臯羽墓

憫忠猶有寺慟哭已無臺高義自千古江山餘劫灰亂雲
埋白骨落日冷荒萊望望冬青樹行人空復哀

吳江歸權

拍拍飛鳧水接天江鄉風景故依然宵來行過鴛湖曲便
有吳歌落枕邊

還家作

出門無半年還家似久客非戀兒女懼奈虞飢寒迫客冬
雨雪頻薄田少租息租吏日喧譁典質罄不惜水患今復
遭嗚號定可識何計免追呼欲問先蹙額還念囊中錢未
抵百道積我婦知我意強顏慰踈踏道彼市中米今價賤
於昔旨蓄亦未窮略可娛今夕衰親沉健飯百憂且聊釋

猶勝前年冬欲歸歸不得

姚石甫

瑩

以所著東溟集見貽賦此奉謝

歲暮役甫息歸自之江濱中途徧罄雁蒿目難具陳鄉閭
尙未至氣象已略新懷疑徑入室亟起問所親始知撫循
早爲有賢使君使君面未識姓字吾嘗聞讀書尙實用浮
榮非所論向者宦閩海聽斷皆稱神其俗習強悍化之使
還醇今來宰吾邑有脚歌陽春偏災正迭告大吏深憂勤
使君憤所切民俗心尤塵賤子幸邂逅歡會同清尊高論
聽側耳慷慨情知敦猛烈固傷惠姑息豈卽仁諒非勵廉
恥氣節何由振安得鳴琴化久被斯邦人膠庠識禮讓
畝勤耕耘豐年自屢告應感庸無眞手持東溟集歸讀忘

昏晨

呈林中丞

則徐

少穆先生

一疏傳聞達九闈，流民難繪鄭監門。
未償飢溺平生願，敢負憂勞聖主恩。
官閣持籌宵正急，窮檐挾纊戶知溫。
諸生應識公深意，肯使呼號尙滿村。

時公以諸生散振胥吏無至鄉村者

將重赴浙寄諸同人

歡敘親朋得幾曾，恩慙又此束行騰。
何時細雨重開甕，到日春風正試燈。
芳草綠迷橋外艇，夕陽紅過渡頭曾。
遙知官閣梅先放，遞我江樓定早登。

武林遇吳子芾

元焯

羈客居不恆，游處半新識。
誰能加意親，遇君真喜極。
蹤迹

知乖違枯榮卜顏色憶昔少年場意氣各奮激自踏京華
塵歸來面黧黑強顏升斗營青氈棄猶惜君想奇更奇檢
典注名籍雖知李與溫才名重交辟於古稱巡官尙爲諸
侯客卑卑豈如今積薪況難得鳳鸞矢所栖枳棘又焉擇
絮語忘夜深雨風動悱惻

孤山探梅同程雪門

泰元

夜夢踏荒苔晨起放孤艇春寒勒梅花初萼凍未醒繫纜
孤山橋暗香若微領入寺共游侶回廊繞迂迴石磴暫小
憩衣香雜人影老幹倚疏疏不解競妝靚小鳥時一嘯幽
寂見眞境誰與獻清供新泉淪佳茗逋仙杳何許鶴去但
空嶺孤懷悵渺然勞生默心警

石門觀瀑和袁鶴潭

廷璜韻

兩崖峙晴空陰靄變朝景矧茲晦明交暝色起叢嶺疇能
筇獨攜古洞探幽迴皓月忽凌霄澄輝散峰頂羣動生太
虛天宇覺彌靜飛瀑來西南百丈挂修綆銀潢訝傾翻怒
馬失馳騁不斷聲潺湲側聽心生警有若憤聚曾激發恣
俄頃又如抱古怨嗚咽細流併淙淙瀉寒玉光錯月華靚
元音留何時閉鬱乃荒梗謝公歎長往勝境闢誰省有美
奮千載孤懷接遐耿同游二三子塵慮亦交屏積雪望未
消皚皚逼衣冷余病恨未偕奇賞羨何幸遙指元鶴飛仙
蹤墮煙艇

張蒔塘

吉安

先生宰永康有惠政沒後士民爲立專

祠經過未得展謁感紀斯詩

廉吏不可爲斯言毋乃激請看永康民三代道自直永康
昔水災閭閻苦乏食發粟望官倉成例奈相格磬磬億萬
眾仰面少人色邑令顧之哀發憤自投劾上官交稱賢徧
振亟飛檄民命賴以蘇憂勞豈身惜至今三十年四境感
遺澤羣議建專祠香火奉朝夕詎非公道存邢易私恩得
社配汝陰令冢立桐鄉裔千載有同揆古今共矜式慎毋
薄儒生康濟謂非識吾鄉有斯賢興起望踵迹我行過新
祠瞻望重歎息

桐江雜詠

脂車苦勞瘁進艇差夷猶况茲佳山水相對忘優游襟塵

暫一拂曠然開吟眸牽風任浮藻狎浪看閒鷗遠山露窈
窕密樹蟠龍蚪水清若無底歷歷沙石浮蓬窗坐寂靜淪
茗供新甌隔船送水調宛轉紫歌喉臨風一長嘯聊此消
煩憂

桐君邈千載故蹟誰能尋相逢荷樵客落日方空林停船
暫問訊遙指高高岑往來歎役役歲月悲駸駸逝者不可
追自古匪伊今何能去採藥毋使塵勞侵峭帆看高挂破
浪乘江心順風亦偶遇遲速知誰任笑問籠中雀何似沙
聞禽

沿江聳危厓層疊鎖煙霧風帆徑此停攝衣趁餘步上有
子陵臺下有皋羽墓兩賢亙古今高節風雲護所遇雖各

殊經過有同慕我來薦渚蘋蒼茫正日暮更尋方干居荒
涼竄狐兔人代知幾更一往卽成故皓月漸東升望望悵
歸路

勝境披輿圖尋覽孰能竭桐江百里間本是神仙窟柑酒
何人攜愛此草廬結惜非好春時清音聽已歇同游二三
子流連尙林樾家鄰姑蘇臺山水頗清越入市正楊梅登
盤有鱸鱖風味我方思歸期未可說鼓柁且江頭煙波送
落日

舟中見流螢

掩抑隨流水熒熒光本微祇憂風不定肯借月生輝偶爾
入修竹有時點客衣最憐村落畔不得畫堂飛

定香亭池荷盛開偕同人作

西湖六月涼風催沿隄十里荷花開幾度來游看不足欲
去未去時徘徊今居此亭正花盛圓葉田田散千柄朝朝
暮暮坐花旁漸亦相忘境幽勝偶然夢醒日未生枕邊香
氣回彌清披衣亟起繞池走含苞欲迸還餘馨曉妝未竟
欲何擬鉛粉濃施那可比姍姍仙骨本天成綠水相依倍
旖旎空亭高築何人留一時觴詠思名流百年盛事定誰
繼賓賢主雅皆千秋愧我胷塵未能埽看花只恐花相笑
諸君朗抱吾不如聊共臨風倚水調

四照堂夜讌同吳仲倫

德旋

袁鶴潭朱春圃

崇實

崇堂枕廣池涼颿夜微動張燈啟華筵珍錯雜廚供殘荷

尚作花香氣隔簾送絲竹非所懽清談自交重生各鄉里
殊居乃一室共林茂鳥自歸風響竹知弄此會豈不良浮
榮笑安用離意奈暗生四座默誰諷仰視檐際河不盡意
潁洞酒闌柝聲催懽愁併客夢

送朱春圃孝廉返涇縣余亦因病欲歸

蕭齋風雨鎮橫斜支枕秋聲聽獨嗟最是送行偏在客始
知有病只宜家池荷已少開殘葉庭桂猶餘未作花聚散
不常光景換相思從此各天涯

書孟郊游子吟後

一日客中多一日親前少一日復一日親老子亦老顧茲
身上衣那得如常好手綫縫年年預計西風早親淚漬幾

許作客何時了安得長親前富貴復何道一讀游子吟我心怒如擣

渡錢塘江

荒寒落日混滄溟萬里江流夜不停昏樹嘯風翻浪白亂帆捲雨失山青潮回強弩聲含勁沙涌長鯨氣帶腥問渡可堪當歲暮故鄉愁望路冥冥

過蕭山縣

一櫂蕭山路先人此舊游我來何處問回首不勝愁落日明前渡西風冷客舟更看衣上綫悽絕俯寒流

經曹娥墓作

我行至曹江換船正日暮候將雨雪零行李亟爭渡江風

捲潮來馮夷肆餘怒但聞喧譁聲莫辨蒼茫路長鯨鼓狂
颯瘦蛟吐毒霧行路自古難死生固有數忠信苟不渝風
波亦何怖不見古孝女救父江流赴至今往來人爭拜曹
娥墓

雜感

罡風獵獵遇清都吹墮元衣使者符一例枝柯收鐵網不
須海上種珊瑚

聞道雲中別有天絳幢彩仗引蹁躑不知何處金銀氣空
向高臺望列仙

有人爲余寫照賦謝

詞筆如君自絕塵丹青餘事亦精神如何徧寫公卿後又

貌尋常行路人

客裏相逢一倍歡
浮名同歎誤青氈
只愁費盡長康骨
相虞翻畫亦難

陳石士先生招同吳退旃

精

侍郎富海颿

呢揚阿

中

丞夜讌卽席賦呈

偶陪公讌庾樓清
風月今宵許共評
兩浙文章歸橐鑰
一時江海靖鯢鯨
吳侍郎以主試留浙與中丞同閱海塘
談深不覺更籌換
坐久頻煩候吏迎
天象明朝人定說
使星旁有客星明

歲暮寄親友書各系一詩

才名十載滿雞林
被放同歸感不禁
只恨雨花臺畔路
西

風黃葉誤君尋

固始蔣子淵

空負狂名願總虛近來蹤迹欲何如歸期聞道澄江阻兩
雪天寒尙校書

賈山毛生甫

十年消息斷江干寥落情懷付一官莫道放衙無箇事詩
名聞已滿長安

太倉徐秋士

一甕坐破短長檠白髮驚看兩鬢生誰識遺經還手抱里
中今有鄭康成

陳木癡

苦吟近日似君無心事千秋肯自孤爲問故園風雪夜幾
人曾到小菱蘆

朱仲環

紛紛誰是眼中人抱膝憂時意獨眞想得一燈孤館裏自
將鈔法論津津

王亮生

陳石士先生招同蔣伯生

因培

泛舟湖上

不識貂蟬貴行春屏八驕金尊移雅興落日發清謳樹密
樓爭鳥波平泛喜鷗招邀得蔣詡高論助尋幽

呈蔣伯生丈

才名早向濟南知老去疏狂尙舊時漂泊一生空薄宦流
傳四海有新詩清尊偶共西湖泛畫舫深愁落日移風雅
得親成我幸細論何惜與臨歧

得周雨蓀大令書答寄

雲閒聽嘹唳忽墮雙飛鴻口銜故人書遠道來關中書中
何所語草草墨不濃相憶祇略道儉歲念屢逢薄祿養未
遂蹤迹成飄蓬聊分監河粟藉供游子春感君意良厚愧
我情偏慵十年不相見緘札疏郵筒雖知古交道不在有

無通分金亦知己此誼千秋同不然管與鮑何以稱高風
一詩寄相謝爲道貧非窮

將移席武林郡廨留題定香亭壁

空桑偶三宿戀戀猶人情況我三年來坐卧常此亭亭前
半畝池綠水看盈盈池中千荷葉搖漾生風輕花時鎖相
對香氣浮空冥興來恣吟詠坐久襟彌清主去客爭罷良
會候已更徘徊尙明月零落成晨星人生聚散感百歲凡
幾經留此雪鴻迹徒令悲勞生

旅感

出門笑惘惘謂無丈夫氣彼徒戀妻孥誠若有可議豈知
琴瑟情未減棣鄂義一齊且終身此心永相繫變有柏舟

悲常亦雞鳴勵所以東山詩憫及鶴鳴細王道本人情聖
賢不立異但徇燕暱私毋怪棄捐易自我游武林輾轉每
曾意有親已衰白有子尙幼稚一弟痛早亡門戶欲誰寄
賴有同心人俯仰一身替稍使游子魂得免雨風悸嗟哉
歲屢荒柴米或不繼念此能毋傷中宵自隕涕作詩聊慰
勞歸期指冬季

宿海會寺靜公禪房

入寺不唾寺僧地我初來此拂僧意口中時作吽唔聲教
誦法華不能記靜公知我淡岩人供饌伊蒲了不異朝聆
說法暮講經漸覺入座生雲氣王侯螻螻邱墟同頓悟忽
徹西來義願更醍醐爲一灌豁然妙解無上諦

贈涂松門

鴻占

吾鄉善書推何人
通政下筆如有神
平生斂手欲誰服
稱不去口知惟君
我聞君名未識面
今者之江數相見
僧寮寂靜少客過
每與論書夜忘晏
興來一卷出袖中
颯若滿座生
雨風遠追二王
欲入室歐虞顏
柳難爲工
心正由來筆自正
恍遇端人肅生敬
在朝在野非有殊
嫵媚終爲世所病
感君爲我累
番揮索我贈
句傾深盃
他時當合顧
公墨裝成誇示雙瓊瑰

得黃韻珊

憲清

書卻寄

音書相望苦纏綿
望得書來一粲然
爲道春風二三月
盡船曾駐六橋邊

相約重來莫更遲
布帆我已欲歸時
不堪消息經年斷
同住西湖兩不知

與江秋田

新祖

黃韻珊涂松門話別

失路新知勝舊歡
連宵情話各辛酸
未歸已識相思苦
欲別先愁再見難
出處共商杯懶把
恩仇誰報劍頻看
忘機輸與閒鷗鷺
一任風波夢自安

吳興省墓

晨征舍川途擔簦入山境
岡坡歷紆斜一步一心警
負土憶往時歲次正紀丙
倏忽十暑寒親顏痛違永
漂泊終何成積躬況多眚
松楸撫無恙茲來亦云幸
昔者柳柳州遷謫遠鄉井
拜埽闕四年傷悼每延頌
彼猶畏簡書我徒逐

萍梗負米滯天涯墓祭望哀哽風樹繞依依血淚舉魚餅
何能奉慈母歸隱茲荒嶺

茗水歸舟

墓門回首望依微尺幅蒲帆又獨歸露冷風淒蛩斷響楓
丹橘綠雁橫飛谿纔過雨橋流急岸漸離山樹影稀一路
難忘烏鳥戀夢魂還繞舊柴扉

入門

入門每心驚驚見親顏老親心知我意道我眠食好行路
汝良苦甫歸息宜早聞言偷看親親鬢雪添皓既驚還復
疑但祝親壽考轉盼更辭親親顏隔遠道雖然歲頻歸歸
時亦草草回念幼小時刻不離親抱奈何親已衰偏侍親

惟少親壽縱百年歲月亦易杳子壯不能養返哺愧烏鳥
腸斷欲出門夢魂日飛繞

春潭弟歿十年死亡之日未得爲位以哭歸後追奠

紀感

三月初六日是汝死亡辰今年我爲客未得几筵親歸後
欲追奠惻愴難具陳嗟汝死十載何處招汝魂汝死未除
服慘故罹我身我無他兄弟塊處傷獨存哀哀白頭母慟
哭忘昏晨慰母恨無計遭遇多迢迢米鹽感窮乏僕僕勞
風塵客游動經歲歸省嗟難頻回憶汝未死借汝侍二人
融融每一室無或離逡巡汝死翻爲客致貽親憂塵辭親
重悽惻告訴知無門儻汝不前死此憂汝能分汝死亦已

矣我生痛安論諒無兄弟苦應亦儕窮民汝魂庶來卽風
雨懷黃昏

題王禮門

元辰

外舅遺照示婦弟耕畬

士錦

茂才

世風徇卑污亮節誰嶙峋肅然見遺像浩氣今猶存會昔
更貪冒荼毒遭儒巾姓名徧鈎籍禍起知何因撈掠等徒
隸慘酷無比倫懦者幸苟免黠者反噬吞廉恥欲誰顧控
訴真無門先生憤所切汲汲求吾仁直道有三代冤顛通
天閻鼠窮技何用螻屈道終伸滂膺雖縲絏青史名偏尊
同時我先子大義爭斷斷不測痛屢蹈素守庸胥淪因之
結姻好古誼相重敦賤子質雖魯道範放時親典型幸有
託庶免爲愚民風木痛先後大道將安聞徒令兩孤子先

德常同論浮名詎足慕清芬期無湮倏忽已十載追念含
酸辛撫公貌如昨涕泗交紛紛

江南水旱頻逢中丞林公謀種再熟稻以蘇民困出

示李廉訪

彥章

所輯催耕課稻編書此奉呈

教稼重周官土宜利分布未聞東作事聽民自趨赴近者
親民官視爲不急務蚩氓彼何知物土習豈素水溢與旱
乾但自天時付荒歉遂頻仍老農亦莫悟中丞惻然憂輟
轉得其故再熟宜南方土性未應誤晚成縱不齊早收庶
補助何致風雨愆終歲空勤苦抱此惘惘心眞宰應可訴
所慮更法始疑沮每交附今無田峻官阡陌孰親度同官
得廉訪善舉佐公措一編遐邇頌成效粵西著德意感親

承仁併願永護

金手山

學蓮

丈枉訪贈詩奉謝

晨起有客叩我門長我十年稱丈人丈人詩名久我耳思
之未見今始親問從何來識邗上此邦壇坫人知聞南城
重望繼德水一時座客皆彬彬抽毫授簡各誇詫眼底直
欲空諸君今雖風雅漸衰歇何得片席無人分手持寸集
問安往出門四望心逡巡卞和之玉莫邪劍寶光瑞氣時
凌雲貢之朱門那知貴委棄何若荒江濱慨然贈我動感
激更枉佳句真有神蚤吟蟀怨豈足道道然鸞鳳知非羣
謬引同調我豈敢別裁僞體心猶殷庾郎鮭菜足供客雨
窗休惜宵重論人生百年過亦易姓名身後誰長存依人

落落計豈得殘杯冷我徒酸辛何時茅屋許同結高吟梁
甫歸荒村

鈔書

枯管無花乞不靈年年賣字感飄零讀書已負平生願慙
愧青箱舊寫經

薑芽瑟縮斂還頻恹恹鴉行污墨新比似鈔胥應略勝笑
人呼我作王筠

意菖山館詩稿卷二終

孫潤庠曾孫家振校字